



# SIUMUT INATSISARTUNI ILAASORTAT

4.december 2012

Malik Berthelsen aamma Kim Kielsen, Siumut

Inatsisartut suleriaasianni § 37 naaportorlugu Naalakkersuisunut apeqquutit imaattut saqqummiup-pavut:

1. Aatsitassarsiornermik ingerlatsisut suliffeqarfissuit aatsitassanik piiakkaminnit isertitaminnik sinneqartoorutunik suliffeqarfimminnut assigiinngitsunut, nunanut akileraarnikiffiusunut nuussisanninnissaat Naalakkersuisut qanoq isillutik nakkutiginnilersaarpat?
2. Akileraarutissaraluanik iloqissiorluni annissuisinnaanernut maanna Aatsitassat pillugit inatsimmi aalajangersakkat pinngitsoortitsisinnaasutut Naalakkersuisut isigaat?
3. Taamattaaq Naalakkersuisut 2011-mili norgemiut ingerlatsiviannik EITI-mik - aatitassanik piiaanermik ingerlatsisut erseqqissunik aaqqissuussaasumik ingerlatsinissaannik suliaqartuusumik - iluaquteqarsinnaanertik eqqarsaatersuutigigaat ilisimaaraarput, tassungalu atatillugu suliami tamatumani sumut killittoqarnersoq apeqquutigerusupparput, tamannalu aatsitassarsiornermik ingerlatsinermik nakkutilliinermut atatillugu aaqqiinermut aqqutissatut isigineqarpa?
4. Allaffissornikkut aaqqissuussaanerput aatsitassarsiornermik ingerlatsisunik London Miningip ingerlanniakkamisut eqqarsaatigisaanut angitigisunik tamanut tunngatillugu nakkutilliinermik ingerlatsinissamut naammassinnissinnaasorinarpa?
5. Aappimi akisoqarpat, assersuutigalugu akileraarutitut akilersuutitut, avatangiisinut il.il. tunngatillugu taakkununga immikkut ukiumut sulisussat qanoq amerlatigisut sulisorineqartussatut immikkoortinneqarpat?
6. Naaggamik akisoqarpat, qanoq isilluni ajornartorsiutit taakku aaqqiivigineqalersaarpat?
7. Aatsitassarsiornermik ingerlatanut aallartinneqartussanut ataasiakkaanut tamanut nakkutilliinermik ingerlatsinermut akiliisitsisarnissamik Naalakkersuisut siunertaqarpat, taamaaliornimilu annikitsuinnarmik akiliisitsisoqassamaarpa, imaluunniit nakkutilliinermik ingerlatsinermut matussusiisumik akiliisitsisarnissaq eqqarsaatersuutigineqarpa?

8. Siusinnerusukkut § 37 naapertorlugu Nalunami guldisorfimmud atatillugu suliffeqarfiup akileraarutaanik qanoq annertutigisumik akiliisoqartarneranik apeqqut unammillernermit tunngassuteqartut innersuussutigalugit akineqarumannigilaq. Akissuteqarumannigineq tamanna Inatsisartut innuttaasullu suliffeqarfiit akileraarutaannik akiliisoqartanniginneranut paasisaqartinnaveersaernerannik siunertaqarpa?
9. Suliniutit angisuut pillugit inatsisissap, inuussutissarsiutinik ingerlatsineq pillugu inatsisip allanngortinnerani kiisalu Alcoamik isumaqatiginninniarnermut ataattillugu siunnersuutitut suliarinninnermit atatillugu immikkut ilisimasallit arlaannaannulluunniit attuumassuteqanngitsut suliffeqarfiillu suut peqataatinneqarpat?
10. Kalaallit Nunaannut inatsisip pingaaruteqartup suliniutit angisuut pillugit inatsisissap ilusilersorneqarnerani ajornartorsiuteqarfiusinnaasunut pingaarutilinnut atatillugu immikkut ilisimasalinnut arlaannaannulluunniit attuumassuteqanngitsunut suliaqartitsinermit aningaasat qanoq annertutigisut atorneqarpat?
11. Kuupik Kleistip tusagassiutitigut apersorneqarneranut atatillugu Danmarkimi inatsisini atuuttunit allaanerusunit suliffeqarfiit nunanit allanit pigineqartut suliffeqarfiit akileraarutaannik akiliinaveersaarsinnaanerannut upalugaarsimassutaasunik inatsisiliornissamut Kalaallit Nunaat pilersaaruteqanngitsaq erserpoq. Danmarkimi suliffeqarfissuit nunanit allaneersunit pigineqartut suliffeqarfinnut akiliisinniarneqartarnerannut ajornartorsiutit annertoorsuit innersuussutigalugit, uagut akileraartarnermit aqutsisoqarfitta inuttakeqisup qanoq isilluni suliaasaq tamanna pitsaanerusumik kivissinnaaneraa pillugu nassuiaateqartoqarnissaa kissaatigineqarpoq.

(Inatsisartunut ilaasortat Malik Berthelsen aamma Kim Kielsen, Siumut)

### **Tunngavilersuut:**

Isiginnaarutitigut kiisalu naqitatigut tusagassiutini aatsitassarsiornermik ingerlatassat pillugit avatangiisinut kiisalu aningaasaqarnermit tunngasunut piffissami kingullermi oqallinneq ingerlanneqartoq inatsisitta pitsaanerpaannginnerannik aarlerilersitsivoq.

Apeqquteqaatigisatta ullut suliffiusut qulit ingerlaneranni akissuteqarfigineqarnissaat qilanaaraarput.